

Date – 18/12/2025
Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. Home Minister Pu K. Sapdanga chuan nimin khan Champhai DC Conference Hall-ah SP Pu Lokeshwaran R leh Addl. DC Pu James Lalnithanga a kawm.
2. PHE Minister Prof. Lalnilawma chuan tui hna humhalh a tul hle tih a sawi a, a bial chhunga VC te chu tui connection nei thei lo mi harsate zawng chhuak turin a chah.
3. Ram pathum tlawha zin Prime Minister Narendra Modia chuan nizan khan a hnukung ber turin Oman a thleng.
4. Parliament chuan Repealing and Amending Bill,2025 a pass.

<><><>

HOME MINISTER

Champhaia cham mek, Home Minister Pu K. Sapdanga chuan nimin khan Champhai DC Conference Hall-ah SP Pu Lokeshwaran R leh Addl. DC Pu James Lalnithanga a kawm.

Champhaia ruihhlo do chungchangah sawi honaah hian, SP Pu Lokeshwaran R chuan Champhai district chhunga ruihhlo do kawnga an thil tum leh thil tih hrang hrang a sawifiah a, ruihhlo an man zat te, ramri an vil dan te, khaw hrang hrang an endik dan te a sawiin mipui hnena inhrilhhriatna an neih hrang hrang leh ruihhlo laka fihlim tura zirtirna an neih te a sawi.

Minister Pu K. Sapdanga chuan police hnathawh chu tha a tih thu leh an taimakna fakawm a tih thu a sawi a, ruihhlo luh tamna district a nihna angin tha taka thawk chhonzawm zel turin a chah a ni. Minister hian District Urban & Development Office pawh tlawhin DUDO leh Staff-te a kawma, an hnathawh dan leh an hmalakna hrang hrang te a enpui a, CHANEM building hmunhma a fang bawk a ni.

Minister hi MJA, Champhai District hruaituten a thlenna, Circuit House-ah an hmu a, Champhai khawpui bawlhhlawh paihna peihfel thuai a tul thute, awmze nei zawka bawlhhlawh sawngbawlina siam a tul thu leh Champhai khawpui thli luankhawmna siam a, sawngbawlina tur din a tul thute an sawipui a ni.

<><><>

HEALTH MINISTER

Health Minister Pi Lalrinpuii chuan Hriselna chu sumin a lei theih loh hausakna a nih thu a sawi.

Nimin khan Minister hian a bial chhung khaw panga(5) - Leite, Rotlang East, Dawn, Ralvawng leh Hlumte-ah te 'AYUSH Health Camp 2025' Integrated Ayush Hospital, Thenzawl a thawktuten an buatsaih chu YMA Run, Leite-ah a hawng a. Pi Lalrinpui chuan, AYUSH in a tum ber chu tihdam aiin in ven a tha zawk tih a nih thu a sawi a, mitin te chu hiselna tha zawk an neih theih nan an taksa enkawl tha turin a chah bawk.

Minister chuan District Hospital te, Community Health Centre hrang hrang te, PHC thenkhat leh Health & Wellness centre AYUSH Directorate in an enkawl ho ah te AYUSH Doctor te rawn theih reng an nih thu sawiin AYUSH Damdawite damlo hnenah a thlawna pek an ni thin an nih thu a sawi a. Integrated AYUSH hospital, khum 50 awmna Thenzawlah a awm thu sawiin he Hospital-ah hian natna hrang hrang OPD leh IPD ah te enkawl an nih thin thu a tarlang.

Minister chuan a bialchhung - Rotlang E, Ralvawng leh Dawn khua te chu tlawh nghalin an khawtlanga mi harsa thlanchhuah te hnenah Krismas thilpek a hlan bawk a ni.

<><><>

CHIEF SECRETARY

Mizoram Chief Secretary Pu Khilli Ram Meena chuan nimin khan Lunglei tlawhin, sawrkar pisa hotu (head of office)-te inkawm hona hun a hmanpui bakah, Lungleia sawrkar hma lakna hmunhma pawimawh thenkhat a tlawh.

Chief Secretary Pu Khilli Ram Meena chuan, sawrkar laipui duh dan anga ram mipuite mamawh ngaihtuahna leh hmasawna hna thawh hrang hrangah tih tur hlen chhuah (saturate) a nih theih nan ruahmanna kimchang leh felfai tak a awm a tul thu sawiin, department hrang hrangte chu an hna thawhna turah leh mipui rawng an bawlna kawngah ruahmanna fel tak siam turin a chah a. DAJGUA hnuai scheme 17 kal tlanga hmasawna tluantling a awm theih nana hma laknaah pawh mamawh bulpui hmasa pahnih - inkal pawhna kawngpui tha leh inbiak pawhna internet tha a awm theih nana ruahmanna siam a, hma la turin District thuneitute chu a chah a. Khaw tin leh mi tin thleng phak ruahmanna leh hmasawna a awm a pawimawh thu sawiin, hriselna, zirna leh nun khaw chhuahna atana khua leh tuite mamawh hrang hrang a nih dan tur tak leh a hun taka pe thei turin department hrang hrang chu theih tawp chhuah turin a chah a. Ruahmanna fel tak a awm chuan sawrkar hma lakna hrang hrangah hmasawna tluantling leh hlawhtling zawk a awm thei ngei ang, a ti.

He hunah hian Urban Development & Poverty Alleviation, Land Revenue & Settlement, Health & Family Welfare, Public Health Engineering, Commerce & Industries, Power & Electricity, School Education leh Sanik Welfare & Resettlement Department hotute'n presentation pein, an department hma lakna hrang hrang dinmun bakah, harsatna leh mamawh an neihte an tar lang a. Lunglei District hmasawna tura sawrkar hma lakna hrang hrangte sawi ho niin, harsatna chin fel dan tur leh chak zawka hma lak dan tur te sawi ho a ni bawk.

<><><>

PHE MINISTER

PHE Minister Prof. Lalnilawma chuan tui hna humhalh a tul hle tih a sawi a, a bial chhunga VC te chu tui connection nei thei lo mi harsate zawng chhuak turin a chah a, chuti ang mite chu MLA fund atanga puih a inhuam reng thu a sawi bawk.

Minister hian nimin khan Keifanga Zawlbukah PHED, Saitual Watsan Division, District Panchayat Resource Centre leh Saitual Bawrhshap Multipurpose Centre te a hawng a. Minister chuan, Saitual District hmasawna tur rabbi pawimawh tak tak hawn a ni chu lawmawm a ti hle a, sawrkar tharin Year of Consolidation a hman avangin PHED, Saitual Watsan Division chu hawn a ni thei lawk lo tih a sawi a, kumin financial year tharah Engineer-in-Chief leh PHED lama hotute nen tanghoa theih tawpa an nawr hnua hawn a ni thei ta chu lawmawm a tih thu a sawi.

Minister chuan tui connection ti thar duh te pawhin Khawzawl pan ngai tawh loin mahni district-ah ngei an dil thei tawh dawn a, hei hian mipuite tan awlsamna a thlen dawn a ni, a ti. Prof. Lalnilawma chuan VC te chu tui connection nei thei lo mi harsate zawng chhuak turin a chah a, chuti ang mite chu MLA fund atanga puih a inhuam reng thu a sawi bawk. Minister chuan tui hna humhalh kawngah kalkhawmte chu theih tawp chhuah turin a fuih a, Saitual PHED a thawk turte pawh mi tinte tana dawr nuam tak ni tur leh tha taka hna thawk turin a fuih nghal bawk a ni.

Prof. Lalnilawma chuan KTP General Conference 2026 Saitual District-ina a thlen tur denchhenin UD&PA kaltlangin kawng hrang hrangah hmasawna hna thawh mek a ni tih a tarlang a, Saitual District-in hma a sawn zel theih nan theih tawp an chhuah zel tur thu sawiin, Saitual Watsan Division, DPRC leh Saitual Bawrhshap Multipurpose Centre te chu Saitual District mipuiten an tangkaipui ngei theih nan a duhsakna a hlan nghal a ni.

<><><>

AGRICULTURE MINISTER

Agriculture and Farmers Welfare Minister Pu PC Vanlalruata'n a department chan Agriculture and Farmers Welfare department-in Digital Crop Survey kalpui tha lawmman pakhatna sorkar laipui atanga a dawng chu thawktute inpekna rah chhuah a ni, a ti.

Nimin khan a pisa-ah chanchinbu mite lenga sawmin Agriculture Minister chuan, lawmman pakhatna chuan cheng vaibelchhe 50 a ken tel thu sawiin, India hmarchhak state tan bik cheng vaibelchhe 10 belh a ni a ti a, Mizoram chuan a vai a belkhawmin cheng vaibelchhe 60 a dawg tih sawiin, Digital Crop Survey atana thil tul tamtak Land Mark Geo-referencing leh Land Mark Application siamchawp a ni chunga Mizoramin pakhatna dinhmun a la thei chu thawktute inpekna leh thawhrimna rah a nih thu a sawi.

Pu PC Vanlalruata chuan Mizoramin a lawmman a dawn chu tehfung pathum zinga pakhat a nih thu sawiin tehfung dang pahnih cheng vaibelchhe 30 dawn theihna District tina khaw awmzat atanga 25% Digital Crop Survey kalpui leh cheng vaibelchhe 15 dawn theihna, District tina khaw awmzat atanga 50% atanga Digital Crop Survey-ah pawh lawmman pakhatna dawng leh ngei thei tura theitawpa hma an lak leh mek thu a sawi bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

MPCC PRESS CONFERENCE

Mizoram Pradesh Congress Committee chuan Thawhlelnia Lok Sabha thutkhawma Viksit Bharat Guarantee for Rozgar and Ajeevika Mission Bill pharh chu ni 100 inhlawhna a chhe zawng leh state ti phurrit zawnga kalpuina tur a nih thu a sawi.

Aizawl Press club-a nimina chanchinbu mite an kawmnaah, MPCC aiawh Pu TT Zothansanga chuan Lok Sabha thutkhawma rorel lai NDA bill put luh chu tuna Ni 100 inhlawhna MGNREGA kalphung, a chhe zawnga thlak danglam hlawkna a nih thu a sawi a, sorkar laipuiin Ni 100 inhlawhna-a a sum tum za a 90% chu India hmarchhak state leh Union Tettitory tih lovah chuan za a 60% chauh a nih tawh dawn bakah ni 100 ni thin chu ni 125 a tih nimahsela, an dan siamthar chuan ni 100 inhlawhna a mipuite'n an dikna chanvo neih pawh an humhim theih dawn tawh loh thu sawiin, kum 1924 a Mahatma Gandhi Congress President a lo nih tawh avang mai a MGNREGA tih VBG RAM G – ti a BJP in thlak an tum chu India hnam pa zahlohna a nih thu leh hun lo la awm tura BJP thang that duh vang a ti ni a an ngaih thu a sawi bawk.

<><><>

PM

Ram pathum tlawha zin Prime Minister Narendra Modia chuan nizan khan a hnuhnung ber turin Oman a thleng a. Muscat khawpuiah ropui taka lo lawm a ni. Pu Modia hian airport ah Oman Deputy Prime Minister for Defence Affairs Sayyid Shihab bin Tariq Al chuan a lo hmuak a. Sipai chawimawina nen lo dawnsawn a ni. Prime Minister Modia chuan Oman nena thawhdunna chuan bung thar a kai dawn tih sawiin nghet zawkin an thawkdun thei dawn niin social media lamah a tarlang. Pu Modia hian hi Oman-a India mi chengten an lo lawm bawk a. PM Modia hi vawiinah Oman lal Haitham bin Tarik nen an inkawm dawn a ni.

Nimin khan Prime Minister Narendra Modia hian Ethiopia joint Parliament sessionah thusawiin khawvel chhim lam ram Global South ten anmahnia dinchhuahna kawng an zawh mek a ti a. Global South ramte chuan mitin remin an dingchhuak mek a ti a. India leh Ethiopia chungchang sawiin an thawhdunna chuan an chhehvelah remna a siam tih sawiin mipui rorelna tundinin a awm a, mipui nitin nunah a bet tawh a ni a ti bawk.

<><><>

BILL

Parliament chuan Repealing and Amending Bill,2025 a pass. Lok Sabha-ah he bill hi pass anih hnuin nimin khan Rajya Sabha ah pass veleh a ni a. He bill hi dan hluui 71 paihna tur leh dan pali siamthatna tur a ni a. Union Minister of Law and Justice Arjun Ram Meghwal chuan Prime Minister Narendra Modia sawrkar chuan dan hlui hman theih tawh loh leh awmze nei tawhlo te chu an paih zel dawn tih a sawi.

<><><>